

हरे घास री रोटी ही,
जद बन बिलावड़ो ले भाग्यो,
नन्हो सो अमर्यो चीख पड्यो,
राणा रो सोयो दुख जाग्यो ।।

हूँ लड्यो घणो हूँ सह्यो घणो,
मेवाड़ी मान बचावण ने,
हूँ पाछ नहीं राखी रण में
बैरा रो खून बहावण में,
जद याद करूँ हळदीघाटी,
नैणा में रगत उतर आवै,
सुख दुख रो साथी चेतकड़ो,
सूती सी हूक जगा ज्यावै,
पण आज बिलखतो देखूं हूँ,
जद राज कंवर ने रोटी ने,
तो क्षात्र धरम नै भूलूं हूँ
भूलूं हिंदवाणी चोटी ने,
महला में छप्पन भोग जका,
मनवार बिनां करता कोनी,
सोनै री थाल्यां नीलम रे,
बाजोट बिनां धरता कोनी,
ऐ हाय जका करता पगल्या
फूलां री कंवळी सेजां पर,
बै आज रुळै भूखा तिसिया,
हिंदवाणै सूरज रा टाबर,

आ सोच हुई दो टूक तड़क,
राणा री भीम बजर छाती,
आंख्यां में पानी भर बोल्या,
मैं लिखस्यूं अकबर ने पाती,
पण लिखूं कियां जद देखै है,
आडावळ ऊंचो हियो लियां,
चितौड़ खडयो है मगरां में,
विकराळ भूत सी लियां छियां,
मैं झुकूं कियां ? है आण मनै,
कुळ रा केसरिया बानां री,
मैं बुझूं कियां ? हूं सेस लपट,
आजादी रै रखवाला री,
पण फेर अमर री सुण बसक्यां,
राणा रो हिवड़ो भर आयो,
मैं मानूं हूं दिल्लीस तनै,
समराट् सनेशो कैवायो ॥

राणा रो कागद बांच हुयो,
अकबर रो' सपनूं सो सांचो,
पण नैण कर्यो बिसवास नहीं,
जद बांच नै फिर बांच्यो,
कै आज हिंमाळो पिघळ बह्यो,
कै आज हुयो सूरज सीतळ,
कै आज सेस रो सिर डोल्यो
आ सोच हुयो समराट् विकळ,
बस दूत इसारो पा भाज्यो,
पीथळ नै तुरत बुलावण नै,
किरणां रो पीथळ आ पूग्यो,
ओ सांचो भरम मिटावण नै,

बीं वीर बांकुड़ै पीथळ नै
 रजपूती गौरव भारी हो,
 बो क्षात्र धरम रो नेमी हो
 राणा रो प्रेम पुजारी हो,
 बैर्याँ रै मन रो कांटो हो,
 बीकाणूँ पूत खरारो हो,
 राठौड़ रणां में रातो हो,
 बस सागी तेज दुधारो हो,
 आ बात पातस्या जाणै हो
 घावां पर लूण लगावण नै,
 पीथळ नै तुरत बुलायो हो
 राणा री हार बंचावण नै,
 म्है बाँध लियो है पीथळ सुण,
 पिंजरै में जंगळी शेर पकड़,
 ओ देख हाथ रो कागद है,
 तूं देखां फिरसी कियां अकड़ ?
 मर डूब चळू भर पाणी में
 बस झूठा गाल बजावै हो,
 पण टूट गयो बीं राणा रो
 तूं भाट बण्यो बिड़दावै हो,
 मै आज पातस्या धरती रो,
 मेवाड़ी पाग पगां में है,
 अब बता मनै किण रजवट रै,
 रजपती खून रगां में है ?
 जंद पीथळ कागद ले देखी
 राणा री सागी सैनाणी,
 नीचै स्यूं धरती खसक गई
 आंख्यां में आयो भर पाणी,
 पण फेर कही ततकाळ संभळ,
 आ बात सफा ही झूठी है,

राणा री पाघ सदा ऊँची,
राणा री आण अटूटी है।
ल्यो हुकम हुवै तो लिख पूछूं
राणा नै कागद रै खातर,
लै पूछ भलांई पीथळ तूं
आ बात सही बोल्यो अकबर,
म्हे आज सुणी है नाहरियो
स्याळां रै सागै सोवै लो,
म्हे आज सुणी है सूरजड़ो
बादळ री ओटां खोवैलो ;
म्हे आज सुणी है चातगड़ो
धरती रो पाणी पीवै लो,
म्हे आज सुणी है हाथीड़ो
कूकर री जूणां जीवै लो
म्हे आज सुणी है थकां खसम
अब रांड हुवैली रजपूती,
म्हे आज सुणी है म्यानां में
तरवार रवैली अब सूती,
तो म्हांरो हिवड़ो कांपै है,
मूंछ्यां री मोड़ मरोड़ गई,
पीथळ नै राणा लिख भेज्यो,
आ बात कठै तक गिणां सही ?
पीथळ रा आखर पढ़तां ही
राणा री आँख्यां लाल हुई,
धिक्कार मनै हूँ कायर हूँ
नाहर री एक दकाल हुई,
हूँ भूख मरूं हूँ प्यास मरूं
मेवाड़ धरा आजाद रवै
हूँ घोर उजाड़ां में भटकूं
पण मन में मां री याद रवै,

हूँ रजपूतण रो जायो हूँ,
 रजपूती करज चुकाऊंला,
 ओ सीस पड़ै पण पाघ नही,
 दिल्ली रो मान झुकाऊंला,
 पीथळ के खिमता बादल री
 जो रोकै सूर उगाळी नै,
 सिंघां री हाथळ सह लेवै
 बा कूख मिली कद स्याळी नै ?
 धरती रो पाणी पिवै इसी
 चातग री चूच बणी कोनी,
 कूकर री जूणां जिवै इसी
 हाथी री बात सुणी कोनी,
 आं हाथां में तलवार थकां
 कुण रांड कवै है रजपूती ?
 म्यानां रै बदळै बैर्यां री
 छात्यां में रैवैली सूती,
 मेवाड़ धधकतो अंगारो,
 आंध्यां में चमचम चमकै लो,
 कड़खै री उठती तानां पर,
 पग पग पर खांडो खड़कैलो,
 राखो थे मूँछ्याँ ऐंठचोड़ी
 लोही री नदी बहा दूला,
 हूँ अथक लडूला अकबर स्यूँ
 उजडचो मेवाड़ बसा दूला,
 जद राणा रो संदेश गयो,
 पीथळ री छाती दूणी ही,
 हिंदवाणों सूरज चमकै हो,
 अकबर री दुनियां सूनी ही ॥

हरे घास री रोटी ही,
जद बन बिलावड़ो ले भाग्यो,
नन्हो सो अमर्यो चीख पड्यो,
राणा रो सोयो दुख जाग्यो ॥

स्वर प्रकाश माली ।
प्रेषक कुलदीप मेनारिया,
9799294907

Source: <https://www.bharattemples.com/hare-ghas-ki-roti-in-hindi/>



Bharat Temples

Complete Bhajans Collections - Download Free Android App
<https://play.google.com/store/apps/details?id=com.numetive.bhajans>

Facebook: <https://www.facebook.com/bharattemples/>

Telegram: <https://t.me/bharattemples>

Youtube: <https://www.youtube.com/channel/UC24oJCxZjyhhKzSUD-Lt9Tw>